



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 10 Yangia anidakangma :

f Tir Yimiyim

tiryimiyim@aolima

tir yimiyim

TAPAK 8

Tir Kovind-i National Sports Awards 2021 agütsü

Duterte'er jala Sara-i Philippines tatong tir atema tokteptsü



VOL. XIX ONO. 37 (ADOK 37) DIMAPUR AMUNGNÜ (SUNDAY) YIMPOKSÜI (NOVEMBER) 14, 2021 ₹ 5.00

Foothill Road atema telemtetba kar agiogo

Dimapur, November 13, 2021 (TYO): Nagaland Foothill Road Coordination Committee (NFHRCC)-i Nagaland sorkar dang mapa inyaksü tsüingüm aruogo anungji tekaraba nung work orders agütsü atema tender mapa inyakang ta ayongzükogo. Gari lenmang junga yanglutsü atema Department, NFHRCC aser contractor tsüingda tenangzükteptsü, ta NFHRCC-i tanü senden amandang telemtetba agiogo.

Maneni, Department aser NFHRCC nati tesem tonga oa mereprang tashi contractor nem bill magütsü ta parnokisa bangzüngtep. Iba mapatong inyakba nung terata madoktsü aser mapa tekaraba nung inyaka aotsü atema NFHRCC aser Department tsüingda senden amentsü lemtet, ta Convenor, NFHRCC Supu Jamir aser General Secretary W. Lemba Chang nati sangdong ka nung ashi.

NPCC-i Mon district semdang

Dimapur, November 13, 2021 (TYO): Nagaland Pradesh Congress Committee-i state sorkar anema district ajunga sema senzüsü tenzük aser parnoki Mon district sema senzüogo.

Ex MP aser AICC Incharge of Nagaland, Dr. Ajoy Kumar-i Tir K. Therie-i anir NPCC tour team den külemi Mon semdanga liasü.

Parnoki Sheanghah Chingnyu yim semdang aser idakji Angh, GBs, village council züngsemtem, arogo aser kaketshir lennirtem den senden ka amen, ta Communication Department, NPCC sangdong ka nung ashi.

Senden nung village council chairman-i NPCC telok pelaa agizük aser Nagaland nungi adena orr alir kati par yimtsüing tang mezüing atema semdang er ashi.

Yimdaklirtemi pa pelaa agizükba atema Dr. Ajoy Kumar-i pelaba ashi aser gari lenmang tia kanga mejungi aliba atema nemjemba bilemba metedaktsü.

"Nagaland nung NDPP-BJP-NPF teloktep sorkar ajanga nübertem aser state atema tamakok bentsür aruogo. Nagaland nung iba sorkar dang nungi tajungba ka nungdaker" ta paisa ashi.

"BJP sorkari India nung telemsa adokdaksütsü meranger saka Indian National Congress (INC)-i BJP-RSS ajanga telemsa adokdaksütsüba merangba mapa

nung tamakok ngudaktsütsü. 2024 küm Congress sorkar arutsü aser tesüiba ama mapang tajung bener arutsü" ta paisa ashi.

"India sorkari Nagaland atema olemtep tembangogo ta shiaka Nagaland nung MLA 60 prongi India sorkar nem Nagaland lemdangtsü atema temelaba agütsüogo" ta NPCC tir Therie-i ashi.

DCC Mon office nung K Therie-i party ketdangpurtem den senden ka amandang 2023 general elections atema mapa inyaksü ayongzük.

DCC aser ACCC ketdangpurtemi tekaratiba nung polling booth committee tem tentettsü, ta paisa nenshia metedaktsü.

"2023 küm Nagaland nungi BJP-i aniba teloktep sorkar atsüingdokang aser taoba mapang tajungtem lepa bener arung. 2023 general elections nung NPCC-i candidate 60 toktepdaktsütsü" ta Dr. Ajoy Kumar-ia ashi.

NPCC tour team nung W. Akum Yim VP, NPCC, Athang Chongloi GS, NPCC, Shaboh Konya, Ex MLA & GS, NPCC, X Chophika Sumi President, NSUI Nagaland, Yongyo Konyak, Chief Organizer Seva Dal aser Gobind Pradhan Chairman, Social Media Minority Dept (NPCC) nungertem dena liasü.

Government-ji nübor aser nüborji Government

Mangkolemba, November 13, 2021 (TYO): Government-ji nübor aser nüborji Government ta asüba tangatetba nung küm semer tema tashi Mangkolemba subdivision nung alirtemi aremzük arur.

Mangkolemba nung alirtem den NGOs, lokti balalai shilem tulu agia kümsa küm gari lenmang anepalua arur. Nagaland nung 29th aser 30th assembly constituency lennir balala den zülü nung aser tebang agi khurettem lemsatepa aruogo saka tanü tashi nung mapa küma aoba mali, ta Civil Society Organisations, Mangkolemba subdivision sangdong ka nung metedaktsü.

Ao lima nung tsükong trok lir aser Mangkolemba Subdivision kübok tzükong asem dena lir, saka constituency ter nungi ana dang Mangkolemba subdivision kübok lir. Government-i Mangkolemba subdivision yamai mezüingmeshia aruba joko maremteter, ta parnoki ashi.

Nagaland government-i

Longnak nungi Mangkolemba tashi kilometre 11 lenmang anepalu masür aser iba yagi Jangpetkong, Japukong aser Tsürangkong hau ta maliba sayur, ta parnokisa ashi.

November 1, 2021 nü Executive Engineer Office (R&B) Mangkolemba shibangja lir saka tanü tashi government-i tiyazu telangzüba tashi magütsüba ya Mangkolemba subdivision nung alirtem mezüingmeshiba lir, ta CSOs-isa metedaktsü.

Nübertemi sorkar dang tejashi sayua November 15 nü Mangkolemba Subdivision shibangtsü (Medical aser police dang melar) anungji shir teloki iba anema inyakdir nübertemi tatem tashi bushitsü, ta CSOs convenor I. Tia Jamir aser secretary Wapong nati sangdong nung ashi.

Mangkolemba Subdivision nung alirtemi lungkak aitba mapa tasembuba tenzüktsü anunji nisung ajaki ochi nung tashi angaa anidaktsü mepishir, ta tenatisa metedaktsü.

Naga nunger longjemtsü atema Naga Club-i len aniang: Niketu Iralu



November 13, 2021 nü AMK conference Hall Kohima nung tir Kuolachalie Seyie-i (achiji nungi tasembuba) anir Naga Club ketdangpur tasentem külemi agiba noksa angur.

Kohima, November 13, 2021 (TYO): Küm 100 tejen Naga Club-i tanü putu nung Naga nunger len aniang ta Naga peace activist, Niketu Iralu-i tayongzükba agütsüogo.

"Naga nunger terata nung aliba aser telemsa adokba mapang ka nung Naga Club lennirtemi longjemer len anitsüla" ta Iralu-i ashi.

Honibarnü AMK Conference Hall, Kohima nung Naga Club pur lokti senden amandang pai iba onük jembi.

Naga Club ya 1918 küm tentet aser iba ya Naga nunger sabang mezüingbuba lir. Naga Club-i January 10, 1929 nü Simon Commission nem mezüingbuba Naga national political memorandum agütsü aser iba ya Naga yimten maparen

tajemdakdak ta züingshir.

"Nagaland nung temelenshi nungdaker aser iba temelenshiji asenok dak nungi tenzüktsüla. Naga nunger tsüingda tamang mekatetba aser temolung melemtep agientsü atema asenok melenshitsüla. Asenoki tangar dak tai meshiii aseni aibelen, tamakok anguba aser tai inyakbatem ochishia nangzüktsüla" ta Niketu Iralu-i ashi.

Asenok kechi shitak ta masü saka shiba shitak ta süa raratepba ajanga Naga loktiliba nung ashishitep ken o tem adoka lir, ta paisa ashi.

"Naga nungeri Naga Club ya asen kibong ka ama ano magizük lir. Nübertemi Naga Club nungi angazüktsü aser külemi aintsü magizük" ta Naga Club president Ariyi Neinu-i ashi.

"Naga nunger shiai pei taküm meyipa repringshitsüla. Tanü Naga putu nung lenmang tajungtibaji ochi bushitsüba lir. Ochi bushiba ajanga asenoki Naga nunger aser Naga Club indang putiotsü tali angazüktsü" ta Nienu-i ashi.

"January 10, 1929 nü Naga Club-i Simon Commission nem agütsüba Memorandum nungi tenzük asenoki asen lima tajungba kümdaktsütsü tanüla lir. Ajisüaka, repringdangra tetenzük nung inyakba mapatemji tanübo nungshilung ama dang kümdakja lir aser iba tanüla samaogo. Ochi aser temeten ajanga melenshiba den asenok talenba nungi mesala tashi asen loktiliba süngjema malitsü" ta paisa metedaktsü.

(Maneni tapak 10 nung...)

Manipur nung PLA telungpurtemi nisung 7 khaset Colonel ka den pa kinungtsü aser jabaso dena asü

Imphal, November 13, 2021 (Agencies): Manipur kübok Churachandpur district nung Assam Rifles Colonel ka den pa kinungtsü, jabaso aser jawan pungu tashi telungpurtemi khaset.

AR Colonel ji Viplav Tripathi liasü aser pa den pa kinungtsü Anuja aser tena jabaso Aber (6) nunger khaset.

Churachandpur district kübok Sehkan yim anasa telungpurtemi Colonel Tripathi'er convoy amak. Tanep 10:00 ako meta pa Behiang Coy post nungi meyipa arudang lendongji ajuru.

Colonel Tripathi ya Manipur-i marudang Mizoram nung liasü aser Aizawl nung alirtemi Colonel Tripathi ji ketdangtsü tajung ka aser pai civilian tem mapang shia yari ta ashir.

Telungpurtemi Improvised Explosive Devices (IEDs) amshia amak aser Assam Rifles sepaitemi parnok den khatap.

"46 Assam Rifles nung Commanding Officer, Colonel

Viplav Tripathi den sepai pungui taküm bendanga agütsüogo. Iba lendong nung Commanding Officer kinungtsü aser jabaso na taküm samaogo. DG aser Assam Rifles züngsem ajaki tasütait sepaitem aser kibongtem den mangyimer" ta Assam Rifles-i sangdong ka nung metedaktsü.

Iba tatalokba atema People's Liberation Army (PLA)-i tenüing agiogo.

PLA ya Manipur People's Liberation Front (MPLF) züngsem ka lir. MPLF nung People's Revolutionary Party of Kangleipak (PREPAK) aser UNLF dena lir.

PM Modi-i anir aitsür:

Prime Minister Narendra Modi, Defence Minister Rajnath Singh, Manipur CM N Biren Singh aser tangartemi iba tatalokba khukhua aitsüogo aser taküm bendanga agütsürtem nem tetushi agütsü.

"Manipur nung Assam Rifles convoy amakba khukhua aitsür. Tanü taküm bendanga agütsüba

sepaitem aser kinungertem nem tetushi agütsür. Parnoki taküm bendanga agütsüba amajok masütsü. Iba tejashi mapang nung ni tasür kibongtem den külemi mangyimer" ta PM Modi-i metedaktsü.

"Churachandpur, Manipur nung Assam Rifles convoy amakba atema temolung raksar aser aitsür. Linüki CO 46 AR dena tasütait sepai 5 aser kinunger ana samaogo. Tasür kibongtem den mangyim lemsateper. Iba mapa inyakertem yakta merenshitsu" ta Defence Minister Rajnath Singh-ia metedaktsü.

"46 AR idang convoy amakba khukhua aitsür. State forces aser Para military-i telungpurtem bushitsü tenzükogo. Aibelenertem merenshitsu" ta Manipur chief minister N Biren Singh-ia ashi.

Maneni, Assam chief minister Himanta Biswa Sarma aser West Bengal chief minister Mamata Banerjee naprongi Twitter nung iba tatalokba aitsüogo.

COVID-19 Nagaland: 5 dak putet & 9 taneptsü angu

Kohima, November 13, 2021 (TYO): Honibarnü Nagaland nung nisung 5 dak COVID-19 aliba putet aser nisung 9 taneptsü angu.

"Tanü putetertemji Dimapur nung 3 aser Kohima nung 2 lir" ta Integrated Disease Surveillance Project atema State Nodal Officer, Dr Nyanthung Kikon-i ashi.

"Taoba ghonda 24 tsüingda COVID-19 puteta alir nisung 9 taneptsü angu. Parnokji Wokha

nung 5, Mokokchung nung 3 aser Dimapur nung 1 lir" ta paisa ashi.

Nagaland nung tang nisung 163 anepaludar saka parnok 131 dakbo shirangba yimya kecha mali, ta Dr Kikon-isa shisem.

"Hokolbar tashi nung nisung 716,969 nem COVID-19 vaccine indang dose 12,34,129 agütsüogo" ta State Immunization Officer, Dr Ritu Thurr-i ashi.

"Vaccine agirtemji frontline

workers 60,965, healthcare workers 15,999, arishi küm 45 ser tempur 203,552 aser arishi küm 18 nungi 44 tsüingda alir 436,453 lir" ta paisa ashi.

"Vaccine agirtem rongnungi nisung 517,160-i dose anaprong agiogo. Parnokji frontline workers 48,166, healthcare workers 13,460, arishi küm 45 ser tempur 166,233 aser arishi küm 18 nungi 44 tsüingda alir 289,308 lir" ta Dr Thurr-isa metedaktsü.

Mizoram-i Assam den arrtsü anasa mapa inyakba anener



Aizawl, November 13, 2021 (Agencies): Centre-i state arrtsülen tensa shitak ayutsü tetuyuba agütsüba sülen Mizoram sorkari Assam den arrtsü anasa maparen inyakba anenogo, ta home department ketdangsür kati ashi.

Taküm July ita nung mepetmesü adokba sülen Mizoram sorkari arrtsülen aliba policy duty posts aser camps sendakteptsü atema gari lenmang aser aputem yanglur.

Ministry of Home Affairs (MHA)-i November 6 nü Mizoram sorkar dang state ana arrtsü anasa mangatettep aliba tesemtem tang tang alima tensa merakatsü shidi ka zülü.

Centre-i tuyuba ama state home department-i district administration tem dang mangatettep aliba tesemtem nung tensa tiptema ayutsü

tetuyuba agütsüogo, ta ketdangsürisa ashi.

Mizoram kübok district asem- Aizawl, Kolasib aser Mamit ajanga Assam kübok Cachar, Hailakandi aser Karimganj district tem den kilometer 164.6 agi arrtsütepa lir.

State sorkari Mizoram tsütsü arrtsü anasa nüngdakba mapa inyaksü ta state home minister Lalchamliaana-i ashi.

Timtem nungi kümzüka ayutsü aser nüboritem tsübutepba süngjemdaktsütsü atema arrtsülen state police mapa lemzüksütsü, ta paisa ashi.

"Tensa süngjema ayutsü bilemer aser Mizoram ali nung terenlok mapa inyaker" ta Kolasib deputy commissioner Dr H. Lalthlangliana-ia ashi.

Bengal Eastern Frontier

Regulation of 1873 kübok inner-line reserved forest kilometer 509 ji shitakba arrtsü lir Mizoram indang ta ashir saka külen Assam-i 1933 demarcations ji arrtsü lir ta ashir.

Iba inner line reserved forest nung shilem tuluba ka Assam kübok dena lir aser 1933 demarcations nung tesem aika nung küm noklang tema Mizo nunger liyonga arur.

Mizoram ya Assam kübok dena liasü aser 1971 küm Union Territory balaka ama razüka ao.

Mizoram nung küm 20 tashi telungpur khuret ajuruba sülen 1987 küm state angu. Telungpur maparenji Mizo National Front (MNF) ajanga inyak aser tangbo parnoki Mizoram sorkar yimsü asür aser Centre nunga BJP-i NDA sorkar pusemer.

Assam nung tetsür kickboxer 2 den tangar ULFA (I) nung aden

Guwahati, November 13, 2021 (Agencies): Assam nungi National Level kickboxer ana aser tetsür asem ULFA (I) nung denogo.

Parnoki video ka nung ULFA (I) nung züngsem akümba osang ashi aser iba video ji kanga prokshir.

Tetsür Kickboxer anaji, Nayanmati Chetia aser Sabita Chetia na lir. Nayanmati ya

Tinsukia district nungi aser Sabita ya Dhemaji district nungi lir.

Union Home Minister Amit Shah-i ULFA (I) den olemtep tenzüksü atema pa nem tashi agütsüogo ta tawa tu Assam Chief Minister Himanta Biswa Sarma-i ashi.

Bilemba ama ora Centre-i ULFA den yimjung olemtep tenzüksü akok, ta Sarma-isa ashi.

Form No. 3
[See Regulation-15 (1)(a)] / 16(3)

DEBTS RECOVERY TRIBUNAL GUWAHATI
Suwarna Bhawan, House No. 12, New Town Path,
Near Hanuman Mandir, G.S. Road, Ulubari, Guwahati- 781007 (Assam)

Case No.: OA / 138 / 2021

Summons under sub-section (4) of section 19 of the Act, read with sub-rule (2A) of rule 5 of the Debt Recovery Tribunal (Procedure) Rules, 1993.
Exh. No. 1354

BANK OF BARODA - VS - MR. Y. ALOTO ZHIMOMI

To,
(1) **MR. Y. ALOTO ZHIMOMI**
D/W/S/O- S/o Yevuto Zhimomi, R/o Thahekhu Village, Block 1, Hukiya Sa, Dimapur, NAGALAND- 797112.

SUMMONS

WHEREAS, OA/138/2021 was listed before Hon'ble Presiding Officer / Registrar on **28.10.2021**.

WHEREAS this Hon'ble Tribunal is pleased to issue summons/notice on the said Application under section 19(4) of the Act, (OA) filed against you for recovery of debts of **Rs. 24,77,261.08/-** (application along with copies of documents etc. annexed).

In accordance with sub-section (4) of section 19 of the Act, you, the defendants are directed as under :-

(i) to show cause within thirty days of the service of summons as to why relief prayed for should not be granted;

(ii) to disclose particulars of properties or assets other than properties and assets specified by the applicant under serial number 3A of the original application;

(iii) you are restrained from dealing with or disposing of secured assets or such other assets and properties disclosed under serial number 3A of the original application, pending hearing and disposal of the application for attachment of properties;

(iv) you shall not transfer by way of sale, lease or otherwise, except in the ordinary course of his business any of the assets over which security interest is created and/or other assets and properties specified or disclosed under serial number 3A of the original application without the prior approval of the Tribunal;

(v) you shall be liable to account for the sale proceeds realised by sale of secured assets or other assets and properties in the ordinary course of business and deposit such sale proceeds in the account maintained with the bank or financial institutions holding security interest over such assets.

You are also directed to file the written statement with a copy thereof furnished to the applicant and to appear before **Registrar on 14.12.2021 at 10:30 A.M.** failing which the application shall be heard and decided in your absence.

Given under my hand and the seal of this Tribunal on this date: 30.10.2021.
Signature of the Officer Authorised to issue summons.

Dibrugarh nung temesepba mozü shibelener 3 apu

Dibrugarh, November 13, 2021 (Agencies): Hokolbar aonung Dibrugarh kübok Milan Nagar tesem nung Dibrugarh Police-i temesepba mozü shibelener asem apu aser parnok ket nungi heroin gram 19.33 shi ngutet.

Pua alir asem ya Wasim Ahmed, Shyamprit Das aser Deep Doley nunger ta jangjaogo. Shyamprit Das ya Dibrugarh nung alir doctor ka jabaso lir ta police-i ashi.

Hokolbar aonung 7:00 ako meta deputy superintendent of police (HQ)-i anir Dibrugarh Police telok kati Deep Doley'er ki mita ao aser idangji temesepba mozü shibeleneritemji apu.

"Onoki parnok Dibrugarh

police station-i anir aruogo aser asüngdangyatsü tenzüko. Par asempronlga ya temesepba mozü shibeleneritem lir aser Deep Doley aliba para kidang nungi parnoki iba maparen inyaka liasü," ta police ketdangsür kati ashi.

Dibrugarh police station Officer-in-charge, Bularam Terang-i, "Iba para ki nung lanurtem, shirnok temesepba mozü shibelenba maparen nung dena lir, parnok aliba osang angazük. Iba para kidang nungi nisung asem puogo" ta ashi.

"Iba dak sendakba nung Dibrugarh police station nung FIR ka benokogo" ta Terang-isa ashi.

Par asem yagi agent ket nungi temesepba mozütem alizüker aser ayoker. Par asempronlga temesepba mozü achir aser iba maparen nung kaketshirtem anioka inyakdaksür ta osang ka ajanga ashi.

"Assam nung temesepba mozü shibelenba maparen anemakanga dang junga inyaka arudar. Temesepba mozü shibelenba maparen nung Dibrugarh ya tongtipang tesem ka lir. Temesepba mozü shibelener mongintemi Dibrugarh nungi supply yoker" ta osang ajangasa ashi.

Dibrugarh nungi drug lord Elahi Sheikh-i iba tesem nungi temesepba mozü shibelenba maparen ajunga inyaker.

Form No. 3
[See Regulation-15 (1)(a)] / 16(3)

DEBTS RECOVERY TRIBUNAL GUWAHATI
Suwarna Bhawan, House No. 12, New Town Path,
Near Hanuman Mandir, G.S. Road, Ulubari, Guwahati- 781007 (Assam)

Case No.: OA / 137 / 2021

Summons under sub-section (4) of section 19 of the Act, read with sub-rule (2A) of rule 5 of the Debt Recovery Tribunal (Procedure) Rules, 1993.
Exh. No. 1351

BANK OF BARODA - VS - MR. Y. ALOTO ZHIMOMI

To,
(1) **MR. Y. ALOTO ZHIMOMI**
D/W/S/O- S/o Yevuto Sumi, R/o Thahekhu Village, Block 1, Hukiya Sa, Dimapur, NAGALAND- 797112.
(2) **MRS. AOENLA AO**
W/o Mr. Y. Aloto Zhimomi, R/o Thahekhu Village, Block 1, Hukiya Sa, Dimapur, NAGALAND- 797112.

SUMMONS

WHEREAS, OA/137/2021 was listed before Hon'ble Presiding Officer / Registrar on **29.10.2021**.

WHEREAS this Hon'ble Tribunal is pleased to issue summons/notice on the said Application under section 19(4) of the Act, (OA) filed against you for recovery of debts of **Rs. 85,75,810.47/-** (application along with copies of documents etc. annexed).

In accordance with sub-section (4) of section 19 of the Act, you, the defendants are directed as under :-

(i) to show cause within thirty days of the service of summons as to why relief prayed for should not be granted;

(ii) to disclose particulars of properties or assets other than properties and assets specified by the applicant under serial number 3A of the original application;

(iii) you are restrained from dealing with or disposing of secured assets or such other assets and properties disclosed under serial number 3A of the original application, pending hearing and disposal of the application for attachment of properties;

(iv) you shall not transfer by way of sale, lease or otherwise, except in the ordinary course of his business any of the assets over which security interest is created and/or other assets and properties specified or disclosed under serial number 3A of the original application without the prior approval of the Tribunal;

(v) you shall be liable to account for the sale proceeds realised by sale of secured assets or other assets and properties in the ordinary course of business and deposit such sale proceeds in the account maintained with the bank or financial institutions holding security interest over such assets.

You are also directed to file the written statement with a copy thereof furnished to the applicant and to appear before **Registrar on 14.12.2021 at 10:30 A.M.** failing which the application shall be heard and decided in your absence.

Given under my hand and the seal of this Tribunal on this date: 30.10.2021.
Signature of the Officer Authorised to issue summons.

Assam nung nisung 251 dak Covid-19 putet

Guwahati, November 13, 2021 (Agencies): Hokolbarnü Assam nung nisung 251 dak COVID-19 putet aser iba tashidak ajanga nisung ka asü.

Tang, Assam nung Covid-19 puteter 6,13,563 kümogo, ta National Health Mission (NHM)-i ashi.

Brihostibar nunga state nung nisung 251 dak Covid-19 puteta liasü.

Yashi Sonitpur district nung Covid-19 agi shiranger ka asü. Iba nisung züngsema Covid-19 agi asür nisung 1,347 kümogo.

Hokolbarnü Covid putetertemji Kamrup Metropolitan nung 87, Sivasagar nung 32, BARPETA nung 21 aser Nalbari nungi 15 lir.

Hokolbarnü mozüki balala nungi taneptsü angur nisung 294 liasü. State nung nisung

6,04,303 tashi iba wara nungi taneptsü nguogo. Tang Assam nung nisung 1,870 anepaludar.

Assam nung iba wara adoker külen nungi Hokolbar tashi nung sample 2,51,47,639 tendangogo.

Maneni, Assam nung Covid-19 vaccine dose 2,98,85,037 agütsüogo aser nisung 94,66,377 nem vaccine dose anaprongla agütsüogo, ta NHM-i metetdaksü.



TIR YIMYIM YIMOBILEM (EDITORIAL)

DIMAPUR AMUNGNÜ, YIMPOKSÜI (NOVEMBER) 14, 2021

Tsüngrem anasai odi

Asenok ajak Tsüngrem dak amangertem lir. Ajisüaka, ashiko, asen tamang agi Tsüngrem anasaia moutet zübazübaa amanga alitsüa akok. Aji oda, asen taküm aser kibongbo, tamangerbo tamanger ser nung, Tsüngrem dak nungi talangka pilaa alir ama rongjena bilema alitsüa akok. Iba ama mapang nung asenoki sarasademner saka sarasademtsü onüka marur, asenoki sarasademner saka Tsüngremi asen sarasadembo melangzür amai bilemer ta asüba tia ka nung asenok alitsüa akok. Iba ama tia ka nung, asenok tamang nung jangramatamba mapang ka ajurua lira, ibaji asenok tanüla nung jepaka nüktzü maluba takong mapang ka asütsü. Ibaji tapi agibo masü, kechiyong asenoki Tsüngrem den mejembittetsüsa akümbaji asen dak aliba temenen agi asen Tsüngrem nungi piladaksüba tamaitüsü lir. Iba ama mapangji asenok asoshi kanga lendong mapang asütsü, anungji iba ama mapang nung, menua melii, yakta Tsüngrem anasai aotsüba kanga tongtibang ta Yakob 4:8 nung shia angur. Iba Lai tekong nung ashir, "Tsüngrem anasai oang aser Pai nenok anasai arutsü. Nenok temenen purtem, nenok teka merüktetang aser nenok temulung ana adenba purtem, nenok mulungjang meshitetang." Atangji, tanü asenok teka agi inyakba mapatem bilemdangra, ochishia shitak inyakba mapatembo aika malitsü. Asenok teka agi office nung sign asüba mapatem ya koda? Asenok teka agi bendenba rongsentem ya kong nungi? Asen teka agi yanglubatem ya koba tashi agi inyaker? Asen teka agi kechi inyaka kibong mesür? Kar teka agi pen amer aser kar teka agi prangpong amer. Tekajagi meshitaki inyaka rongsen bendener, ki yanglur aser kibong mesür. Atangji, Tsüngrem tsüngdang asen teka asenoksasa menenbaji asenoki meteta menener. Asenoki Tsüngrem daka amangner aser ochimashi mapatema inyakner. Atangji, asenok temulung ana adenba purtem lir. Iba ama temenen mapa teinyakdak nung asenoki Tsüngrem dang temoatsü, teyari aser taneptsü meshia sarasademner. Ibayongji, Yakob 4:3 nung ashir, "nenoki meshir saka mangur, kechiyong nenoki nenok shi jangraba nung endoktsü asoshi meshir." Asenoki amangba Tsüngrem yabo asen mulung ajak ateta anguba Tsüngrem lir, anungji asenok mulungjang nung kechi bilemer, Pai angur. Aji oda, tanur kati seplepa senzütsü atema sen meshi nung tebu agütsüdim? Hau, atangji, asenoki sarasademner saka temulung teindang agi masü. Asen asen kija agitsü atema, asen asen jangratema alitsü atema asenoki arishi meshir, anema aliba taküm meshir, takok meshir ta tajungbo ajak asenoki Tsüngrem dang meshir. Asenokji kanga tagitsü tait. Asenoki asen nem Tsüngremi moatsüba nungi shinga dena melemsar, tenlaa shitak magütsür. Ali kimonga asenokisa taginüba, lenmang lendi dena atsünga agir aser senotsüa asenokisa tenükshiba, Tsüngrema mali amato sen nungbo sotaker. Iba mulungjang nungi adokba sarasademji Tsüngremi kodaser pelashishia agizütsü. David chubaia pa mulungjang memeshi aser teka memerük agi inyakba mapatem kodang, "Oh Tsüngrem, ni na anema, na anema tai inyakogo, kü dang tai dokang, aser kü dak temulungjang temerük poktetdakjang," ta sarasadema Tsüngrem anasai ao, idangjiang Tsüngrem anasa aru aser Pa taochi agi David temenen nembangtsü (T.Ken 51). Tanü Tsüngremi asenok dang nungi aginüba sarasademji David sarasademji lir. Tsüngrem nungi asenok temulungjang dang masü saka teka dena tasen, shitak ochishia inyaktetba teka nungdaker. Iba teka tasenba jagiang Tsüngrem pelatsüsa ochi mapa inyaktetsü. Ashiko, joko tangbo Covid-19 tashidaka terabo senshia aoerji, tamalen tasütsü tsüba sarasadema Lai bushiba mapang toa amadoker alitsüa akok. Ajisüaka, asen tangatetba aser temulungjang melenshir dang ashi, Tsüngrem temeimbo kodanga memelenshir. Tebu temadokba chir meyipa shilangtsü anogo shia yongya ama, Pai teti asenok temenen lenmang nungi meyipa arutsü yongyaa atar. Asenok teinyaktsü mapaji ochi mulung agi Tsüngrem bushitsüba lir. Tebushiri dang Pa taochijia angutsü. Iba taochi angutsüba mapangjia, ashiko, süitemadoktsüa akok. Lashibai ashir, "Tsüngrem anasai arung aser Pai na anasai arutsü. Kibuba madang nenok ajemalua kümang aser Pai nenok ulutsütsü." Yakob 4:8 & 10.

OLEMSABANG

ABAM SANEN LUDENI 1986 ABAM LEMTET KHEN JUNGA SHISADANGDAKTSÜNER

~ T. Lanutoba Jamir, Dimapur

Sangküm 2022 Molungyimsen Baptist Arogo nung küm 150 Jubilee amungdang ABAM Sanen Ludeni Executive Secretary shilem magidaksütsü ta lemtetba ya jungjunga bilemdangra iba ya ABAM aser Molungyimsen Baptist Arogo tsüngda nung mangatetep masü saka tang aliba ABAM Sanen Luden züngsem den 1981 nung ABAM-i shimtetba ABAM Special Committee tsüngda mangatetep adokba ka lir ta angateter.

Special Committee member-tem

- | | |
|---------------------------------|------------------------------|
| 1. Y. Amongba Mokokchung | 2. Tsüktituba Ungma |
| 3. Jangkidong Merangkong | 4. Imnatangit Chuchu Town |
| 5. Temjenkaba Dibua | 6. Imangdangba Khar |
| 7. Nungsashiba Longchem | 8. Tongpangyuba Lirmen |
| 9. Rev. Sübongsüba Mopungchuket | 10. Tarepyangba Longjang |
| 11. Dr. I. Ben Wati Shillong | 12. Dr. Renthly Keitzar |
| 13. Rev. Imotemjen Guwahati | 14. Tsüknungpenzü Mokokchung |
| 15. L.T. Maja Impur (Convenor) | |

Special Committee-i küm aika record balala Nagaland nung, Assam nung aser America tashi oa bushidanga tengutetba records medemdanga shisadanger 1986 küm ABAM küm tatem mungdangti nung report agütsü aser ibaji Mungdangi agizüka ayu aser tanü tashi iba report-ji Nagaland nung Arogo tenzüka otsü tamentakdak ka süa arudagi. Ajisaka, tanü ABAM Sanen Ludeni taoba Special Committee report aser Central Council-i agizüka ayuba amaji mesüi lemtet ka Molungyimsen Arogo asoshi 29th October 2021 nung agiogo. Asenoki 1986 Central Council lemtetji zübazübaa meblemetsüla, iba lemtet nung onük tongtibang pezü tashi Mungdangi kanga shisa kaa lemteta ayu.

- Mezüngbuba nung Molungkimong yimdak December 23, 1872 asen lima (Soil) nung Arogo tenzüka. (Tangbo December 22, ta melenogo). Iba lemtet yagi asenok Nagaland nung aliba Baptist Arogo tem ajak tamentakdakji December 22, 1872 Molungkimong nung Rev. Dr. E.W. Clark-i Arogo tenzükbaji lir ta jangjatsür. Aser ibai 1960 ABAM Special Committee lemtetba nung agüja angutsü.
- Tanabuba nung Molungyimsen Arogo Molungkimong yimdak December 23, 1872 (Tangbo December 22, ta melenogo) nungji tenzüka ta angateter. October 24, 1876 yabo yim tasen ka Molungyimsen akümba dang lir. December 23, 1872 nung tenzükbaji Arogoji amangbapur yim tasen akümdangji bener ait. (Tangbo December 22 melenogo). Anungji 1947 ABAM Lemtet nung Molungyimsen akümbaji Arogo tenzüka küm aser anogo ta mungyonga aruba ajakji yim akümba anogo dang ta ABAM Special Committee-i lemtetsü aser iba yagi küm aika Molungyimsen Arogo aser ABAM tsüngda nung mangatetepi lia aruba keno tatembang kati bener arutsü.
- Arogo otsü maparen dak sendakba nungi adokba keno case ama Mungdang mesüra kija Arogo shingaia mejembitsü ta telemtetba ABAM-i renema ayubayong tanü tashi Ao Arogo tem tsüngda nung Arogo otsü dak sendakba keno mejembitepi lia arudagi.
- Nüngdakra zülua aliba kuli o (Documents) bushitsüa akok. Iba lemtet ya ajanga asen Ao lima nung Arogo tenzüka otsü atemabo research agitsüba lenmang lapoka yutsür aser tebang otsü masü saka zülua yutsüba documents ajanga par shisa taka Special Committee-i bushiteta bener arua toktsüba lemtet denji medemdanga inyaktsü lenmang sademsadema lapoka yuja lir ta angateter. Anungji par mapang ABAM-ji Arogo tenzüka otsü dak sendakba keno agi kecha timtem makai süia aruogo aser Molungyimsen Arogo ABAM 1986 lemtet nung ajemdaker 22nd December 1997 küm sentong agia mungogo.

Saka kodang 2016 ABAM Temzüng yanglushiba nung Molungkimong yimdak Aolima nung Ao Naga Arogo 22nd December 1872 nung tenzüka ta züluka ayu, tezülurtemibo nükjidong tajung yur zülü südi. 1872 December 22 nung Molungkimong dak alaka shinga yimdaka Arogo tenzüka maliasü, saka iba ya ABAM 1986 lemtet nung zülua yutsüba shilem ka agiteter enokba dang lir aser iba yagi ABAM 1986 lemtetji maka kümdaksür tabo lemteta mali, ashiko ABAM Vision 2030 zülur aser ABAM 2016 Temzüng yanglushirtem jagi Molungyimsen Arogo 150 Jubilee jagi maotsü ta tebilemba nung yanglu masü südi. Sürabangla 1986 ABAM Lemtet nung Molungyimsen Arogoji 1872 December 23, Molungkimong yimdak tenzüka Jubilee 150 amungdang tanü aliba ABAM Sanen Ludeni Executive Secretary Tsüngrem o jembitsü meyoktsü lemteterem jagi 1876 October 24 sülenji Rev. Dr. E.W. Clark-i 1872 Molungkimong tenzüka Arogoji kongi bener aoa ta ashir? Tanüba ABAM lemtet indang jembir, saka iba yagi tesüba nung Rev. Dr. E.W. Clark, Mary Mead Clark aser mezüng Missionary-tem, record-temji melenshitsü tamakoktsü ta nibo angateter.

Tesüba ABAM Special Committee-i 1981-1986 tashi nung jangjajangjaa ngutetba nung yamai shia lir: Saka kodang Dr. E.W. Clark-i anir oa Molungyimsen October 24, 1876 nung yim tasen ka aküm, idangji Molungkimong Arogo ka toktsüba tejangja ka mangur; aser iba Arogo 1892 nung tanaben tasen küma tenzüka, saka ajia 1896 nung loksa aser Molungkimong arogo yabo 1919 nung tenzükbaji metangdangi aruba arogoji lir. 1940 nung Ao Mungdangi tasüngdangba yokba nung telangzüba agütsüba nung Molungkimong arogoia par arogoji 1919 nung tenzüka ta langzüba kuliji angur. Sürabangla iba kuli ya aitsütsüa tanü aliba Sanen Luden züngsemtem jagi record kar nguteta ali mali? Lira ABAM kübok aliba Arogo ajak nem metetdakjangma.

Ano yangi kü tebilemba ka ABAM Temzüng ya ABAM ajungtsü asoshi yangluba Temzüngozüng ka lir. Iba Temzüng nung Ao lima nung mezüng tenzüka arogo yim tenüng zülua ayuba ajanga ABAM kübok Arogo tem nung makmakshimak adoktsüsa kümra yim tenüngji zülua mayu nung tajungba aser ABAM Temzüng zülur asünungji ABAM tenzüka küm, anogo aser yimjia zülutsüla aser iba mapang nung shirnok Arogoisa lungjemer ABAMji tenzüka parnok yim aser arogoia zülua ayutsüla. Asenoki Arogo tenzüka yim indang dang jembir ashi, ABAM tenzüka yim indangjia khen repringdangtsüla, kechiyong ABAM tenzüksü küm ka jilia Ao lima nung aliba arogo tem tenüng züluba nungji Ao lima nung mezüngbuba Ao Naga Arogo tenzüka yim zülusema mali, Nokinketer Mongchen tapak 71. Iba record ya, "Hand book, statistic and Missionaries," nungi agizüka züluba lir.

Maneni ABAM-i adokba "Ao Baptist Arogo Mungdang" Küm Tatem Mungdang Tezülubatam; 1897 - 1971 (ABAM Sesquicentenary nükla adok) VOLUME I, ABAM Literature and Education Department, Kaket tapak 9; 1896 Impur: Arogo tenteta aliba tenüng taser züluba nungjia Naga lima nung mezüng Ao Naga arogo tenzüka yim tenüng zülua mangur. Item kulitem ajanga ABAM 1986 lemtet nung shia alibaji shitak ta jangjatsür. Anungji tamalen ashiba ama tanü koba ABAM aser Molungyimsen Arogo tsüngda mangatetep lir, iba ya tekaratiba nung tanü aliba Sanen Ludentemi shisadanga tajungtiba lenmang ka mebushira 1981 nungi 1986 tashi ABAM-i nongloksüba mapa meranga inyaker tengutetba kuli tejangja bener arutsüba Special Committee aser tanü aliba Sanen Luden züngsemtem tsüngda nung mangatetep tulu adoktsü ama ajiteter, kokrabangla 150 Jubilee-ji Ao lima nung arogo tenzüka nung ajemdaker Naga nung ajaki amungtsü renemshidang Arogo ka aser ABAM tsüngda aser Sanen Luden o tesüba Special Committee-pur tsüngda temulung kuremtepa malitsü asoshi tanü aliba Sanen Luden züngsemtemi kanga shisa kaa 1986 lemtetji khen junga repringshidaksüner ta iba sabang nung lemsateper.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngerü angateta agitsü mepishir



Haiti yimtiba, Port-au-Prince kübok Titanyen yimdaklirtemi America nunger missionary tem chiokang, ta takhangba agüja longkak aitba noksa nung angur.

Council of Nagalim Churches-i asemnü lumia sarasademtsü ayonger

Dimapur, November 13 (TYO): Ato Kilonser, Th. Muivah leniba nung Naga nunger team aser India sorkari tang tasen shimba ketdangser A. K. Mishra tsüingda India-Naga yimjung ken o maneni jembu tenzüka mapang nung Council of Nagalim Churches (CNC)-i ayongzüka October 30-31 anogotem nung Council Headquarters, Hebron nung linüki lumia sarasadema liasü, aser iba mapang nungji Tsüingrem lar ka ajanga, Naga nungeri temenen mapa nungi pilaa tekümtet angutsü aser yimtenren ken o latettsü atema NSCN aser Naga nungeri ano anogo asemnü lumia sarasademtsü nungdak ta Kibubai jembiba shiogo, ta CNC General Secretary, Ikato

Chishi Swu-i sangdong ka ajanga metetdaksü. "Tsüingremi Yakob 1:15 nung yamai ashir, "Kodang temenenji tain kümdir; tasüba adokdaksür." Naga nunger aser NSCN temenen tain kümogo aser obendang ana nung lir. Iba tensa nungi kümzüksü atema Naga nunger aser NSCN-i kanga lumia sarasademtsüla. Shirangertem aser temenen nung asürtem atema taneptsüji Kibuba bushitsüla. Temeneni samatsütsü atema bushir saka Tsüingrem bushiba ajanga teimla angur," ta sangdong nung shia lir. Anungji Naga linük atema tang tensa apir Council of Nagalim Churches-i linüki anogo asemnü November 16

nungi November 18 tashi linüki "Kibuba bushiang aser taküm liang" (Amos 5:6) omen nung ajemdaker sarasademtsü sangdonger. Council of Nagalim Churches-i denomination balala nungi Arogotem, sarasadem teseptem, Nagalim aser bendanglen alir ajak, Naga Army brigades, battalions, units aser regional Arogotem ajaki shia aliba anogotem nung lumia sarasademtsü mepishir. "Tsüingremi asen sarasadem langzütsüsa aser obendang nungi linük jembutsü aser tekaraba nung Naga yimtenren ken o latettsü atema asenoki kanga nendaka sarasademdi," ta kasa sangdong ajangasa ayongzü.

ANOGO ABEN TSÜNGREM DEN

TSÜNGREMJI TAOCHI NUNG TALUBU

Aser Khrista taochi rongsen koba pai asenok madak talubusa meküplokja aliba amato...

- Efesa 1:7

Tsüraburi pei chirnur tashi mangadang jashia züknüa aiter, saka tsürabur dak aria bilemba mulungsentsü aliba ajanga aochia bilemer aser azüktsü aiben songtema ayur. Aji tanur dak aketbayong masü, saka tsürabur dak aochia bilemba tanela jagi atsüanem akatsü mulungtetdaksür. Yamaji asenoka Tsüingrem tsüingdang tashi mangaba, aser Pa anema inyakba jenti liaka Tsüingrem asen tsütsü aiben taochi aser yimlibilem sayur. Aji asen dak temeimtsü aketbayong masü, saka Tsüingrem dak aria bilemba taochi alibayong lir. Asen mapa yari asenok samatsütsü mesüra merenshitsü langa liaka Kibubai mezüingdangteti songtema mayu ama?

Iba taochi ya kobika Pai sayur? Kibuba taochi ya mapang ajak nung aser putu ajak dang aser tatem maka (T.Ken 100:5). Pai benshir. Asenok Pa tsütsü maru tashi Pa taochi agi asenok bushir aser yongya-a atasar. Laishiba nung anasatiba Tsüingrem taochiji tamadokba jabaso meyipa shilangtsü tebuu ataba tatishitsü ya lir. Jabaso meyipa agizüktsü kecha temeden maka, saka tebuu yongyaseta meyipa shilangtsü ata-a aliba ama, tanüa Pai asenok Pa tsütsü shilangtsü yongyaseta atar. Atangji, asen menen dang taochi tuluba lir.

SARASADEM

Taochi agi sünga aliba Kibur Yisu ni ama temenen nisung dang nai taochi aser yimlibilem sayu nung kanga pelar. Ni ne taochi menden dangi arur. Amen.

Chhattisgarh nung Hindu nunger telok kati Khristantem dak azük

November 13, 2021: India kübok Chhattisgarh state nung Hindu yimsü alia amanger telok kati Khristan 64 dak azük; iba tesem nungji police-a liasü saka parnoki kecha meinyak, ta International Christian Concern (ICC)-i metetdaksü. Durg district kübok Oteband yimdak Anil Tandon ta ser nisung kati Pentecostal Mission Arogo nung züingsemtem den benjung ayongzüka amongba mapang nung Hindu nungertem parnok dak azük. Tandon taneptsü anguba atema tenüingsang agüja Khristantem chiyungba benjung ka ayongzüka liasü. Nikongdang 6:00 ako nung benjung tenzüka minute 90 shi tekülem sentong aser sarasadem agitsü sentong liasü. Iba sentong agibaji yimdaklir shingaia mashishi saka 8:00 ako meta Jyoti Sharma leniba nung Hindu yimsü alia amanger telok-Dharma Jagaran Samanvay Vibhag nungi züingsemtem arua timtem agütsü. Osang angazükba agi Dharma Jagaran Samanvay Vibhag telok ya

Hindu nationalist RSS den affiliate süa lir. Osangbener den jembidang Tandon-i, "Ni parnok dang iba sentong ya tenüingsang agütsüba sentong ka dang lir, aser sentong nung adener ajakji Pentecostal Mission Arogo nungi züingsemtem lir ta ashi, ajisüaka parnoki maneni onok amokmeren aser Khristantem dak azük," ta metetdaksü. Hindu nungertem jagi Khristantem meyong osettsüset mita reprang, amokmeren aser azük. Khristantem dak azükba video-a aika social media nung prokshio. Paisa, "Parnok kari ni ki telungi anir atu aser parnok rongnung kati kü dak asemben-pezüben shi maaoktsü. Iba sülen parnoki ni kimai atsüzük aser maneni kü dak azük. Panchayat dangi anir aoba sülena kü dak azük," ta metetdaksü. Iba tesem jagi police aru saka parnoki nokdaker dang tatalokba ajakji repranga liasü. Ghonda ka shi lir sülen ang police-i Khristantemji bus ka

nung anioker Nandini Police Station-i anir ao. Iba sülen Tandon district judge matsüingdangi anir ao aser jail nung puok. Khristantem Hindu nunger telokji anema ken o agütsü saka police-i aibelenertem anema kecha meinyak. Tan ita tetenzüklena Chhattisgarh state nung Hindu nungertem pastor ana dak azük aser Khristantem tepsettsü ta amokmerena liasü. Osang angazükba agi, Dhamteri District kübok Biler yimdak Khristantem tekülem sentong tagidak mapang nung Hindu yimsü alia amanger telok ka arua timtem agütsü, pastor ana dak azük, Laishibatam rongdoktsü aser yimdak Khristantem tekülem sentong magitsüla, ta amokmerena liasü. India nung Khristantem tekülem sentong tagidak mapang nung timtem agütsüba kanga bulua kümdar aser Chhattisgarh nunga Hindu yimsü alia amangertem lokti senden ayonga Khristantem anema jembiba kanga bulua kümdar.

Kohima DC-i Khristmas benjung sübotsü inoktsü atema mepishir

Kohima, Yimpoksüi/ November 13 (TYO): yimti merüksü aser benjung sobutsü inoktsü atema Benjung mongpu atongba dak mepishia metetdaksüogo. sendakba nung Kohima Deputy November 25 Commissioner, Gregory matongdangsa benjung sübotsü Thejawelie, NCS-i sangdong inoka yimti tepor ajungtsü ka ajanga Kohima district atema DC-i Arogotem dang kübok aliba Arogo ajak dang benjung sübotsü inoktsü November 25 anogo tashi nung mepishir.

Chakhesang Baptist Church Council pur küm 50 Jubilee amongtsü

Kohima, Yimpoksüi/ November 13 (Agencies): jangzü aputsü, Rev. Dr. VK, Nuh-i Jubilee nungo kakat November 20, 2021 nü Mission sayatsü, Jubilee tenangzüka Centre, 7th Mile Village, agitsü, Jubilee mong chiyungtsü Dimapur nung Western meshiteta Dr. Adela Mero-i Chakhesang Baptist Church sarasademba sülen lokti Council (WCBCC) pur küm 50 chiyungtsü, ta metetdaksü. Golden Jubilee mong "In Christ General Secretary, Ministry den Jubilee Choir-i ken Alone" omen nung ajemdaker Nagaland Baptist Church atentsü aser Rev. Dr. P. Dozo-Dzudo-i sangdong ka ajanga, i Jubilee mong sentong anogo ka Jubilee mong sentong tembanga sarasademtsü, ta nung Rev, Khrotso Mero-i kasa sangdong ajanga Jubilee nungshilong sayatsütsü, metetdaksü.

OLONG PAITEP # 5996

1			2		3		4		5	
6		7								
					8					
9				10						
						11				
			12							13
	14								15	
					16					
			17							
								18		
19										

- | | | | |
|---|--|--------------------------------------|--|
| TIPILEN | | LANGTSÜNGLEN | |
| 2. Teburtemi tejak nung awaba - (8) | | 1. Temejangdak - (6) | |
| 6. T _ _ _ em - (3) | | 3. Nisung ka mapa inyaksü nübo - (4) | |
| 8. Tzük ayudak - (3) | | 4. Azüntsü asoshi mejemba - (6) | |
| 9. Nüngdakba dang timba - (6) | | 5. Tesangwa agütsüba - (5) | |
| 11. Züina ao - (4) | | 7. Tila masü - (4) | |
| 12. Yangi tzü angur - (5) | | 10. Tebenjem tetsür chanu - (4) | |
| 14. Tangar dang nungi tali - (4) | | 11. Tekolak nung inok - (4) | |
| 16. Senyong masü - (6) | | 12. Tetsüngda - (6) | |
| 17. Oadokdi - (3) | | 13. Tangar inyakba ka inyak - (6) | |
| 18. Tzü tarok - (3) | | 14. Tim masü ta ashi - (5) | |
| 19. Yimtaklir aikati iba ya ki den külemi yanglusemer - (8) | | 15. Asalendong - (4) | |
| | | 16. Tanü dangtsü - (4) | |

OLONG PAITEP # 5995 TELANGZÜBA

- | | |
|---------------------------------------|--------------------------------------|
| TIPILEN : | LANGTSÜNGLEN : |
| 1. Telok, 4. Aluru, 6. Ozüng, 8. Emk, | 1. Tenükjang, 2. Luden, 3. Kiochtsü, |
| 9. Kin, 10. Teti, 12. Süir, 13. Jen, | 5. Lenti, 7. Tajangzük, 11. Teronem, |
| 14. Ola, 16. Talak, 17. Mazük. | 12. Sempa, 13. Jahaz. |

KOMA SÜLA TELANGZÜBA

Q. Akhidang ama, ABAM kübok lanurtem ya küm shia lanur mungdang (Youth Convention) ya Impur nung dang melii, tagizüker dang lira, yimtsüng aser town arogotem nung among nunga koma süla ?

Yamajika asünung junger majung ka asütsü. Mungdangi tarurtem atemabo kanga ajangzüksü saka yimtaklirtembo rongsen tsütsü kanga tim atemtsü.

-SMS

Happy Birthday

TENÜNG : TSEMLI Z
 Tasoba anogo : 13 Nov.
 Küm : 2
 Talidak : Kohima

Ozü jala küm ana tashi anema arishi moatsü nung Tsüngrem tenüng asanger. Maneni ano Tsüngremi özü jala anema aliba den külemi arishi anogo maneni moajangma.

- Temeim Oja, Oba & Kinungertem



TANÜBO NAI LANGZÜANG

Q. Hase art ya koba State indang sobaliba art ka lir.

- [A] Kerala [B] Karnataka
 [C] Andhra Pradesh [D] West Bengal

(Taruba adok nung onoki langzüksü)

YASHI ADOK TELANGZÜBA: Shri Ramayana Yatra Train

AO OSHI ANGAZÜKDAK:

TANÜ ANGAZÜKTSÜBA OJANG



Tir Yimyim

Lentep

(n) tetsüng lenmang nung süng aser au agi jenjangpong yangluba (wooden steps in footpath)

* Alu lenmang nung onoki **lentep** aika yanglu.

Lenti

(n) yimkong jajaba lenmang (main road)

Lenti nung mashimashi mejajatsüla.

Tanur asoba anogo nung salem osang den noksa angati adokdaksünura - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

Tepela Tasoba Anogo



1. Tenüng :
2. Tasoba anogo:
3. Küm : 4. Class :
5. School :
6. Talidak :
7. Salem osang :

NAI-A YA METETTER MA

TAOBA MAPANG NOVEMBER 14 NÜ ATALOKBA KAR:

- 1677 - Prince William of Orange (27)-i English princess Mary Stuart (15) den kibong aküm
- 1680 - Gottfried Kirch-i 'Great Comet' ngutet (Kirch's Comet/Newton's Comet)
- 1906 - US President Theodore Roosevelt-i Panama semdang
- 1908 - Albert Einstein-i 'quantum theory of light' metetpeladaksü
- 1921 - Spain indang Communist Party ngutet
- 1954 - Egypt Tir, Naguib mapa nungi anen; linük nung state of emergency sangdong
- 1965 - US sorkari sepai 90,000 shi Vietnam-i yok
- 1980 - Guam nungi arishi küm 19 tain Kimberley Santos-i 30buba Miss World title angu
- 1984 - NASA-i NATO-3D khaketa yok
- 1991 - Michael Jackson indang "Black or White" video ken FOX TV nung saya
- 2004 - 31buba American Music Awards nung Sheryl Crow, Usher aser Kenny Chesney nungeri takok angu

SUDOKU # 6037

TELANGZÜBA # 6036

2		9		8				1		9	4	6	7	2	8	5	3	1
1		8		5	7	3				8	3	1	5	6	9	7	2	4
							5	4		5	2	7	4	3	1	8	6	9
		9	7	5		8		3	6	2	9	3	1	4	5	6	7	8
5	2	1	3		6	8				4	6	8	3	9	7	2	1	5
8	6				9			2		1	7	5	2	8	6	9	4	3
				7	1					6	8	4	9	1	2	3	5	7
7	3	4	8				9			7	1	2	8	5	3	4	9	6
	1	5		3			2	8	7	3	5	9	6	7	4	1	8	2

OJANG LUTEP # 5583

- INAGÜBA :
- JAAK :
- YAKTINSÜ :
- NGMERA :
- NGDA :
- AK :
- UNNG :
- NGADA :
- NGZÜTAJAK :
- GUMAN :

OJANG LUTEP TELANGZÜBA # 5582

KHEN NUNG AJAK INYAKTSÜ MEMERANGI KA NUNG TEMULUNG AGÜTSÜR INYAKANG

TAN HOPTA ATEMA - KOMA SÜLA ?

Q. Nagaland government-i bilemba ama, Nagaland nung Municipal aser Town Council-tem ya election magii dang tentet nunga koma süla ?



Delhi nung mopung kanga menenba dak sendakba nung November 13, 2021 nü Delhi Chief Minister, Arvind Kejriwal-i Hombar nungi tenzuka hopta ka piyong Delhi nung school ajak shibangtsü sangdongogo.

Air quality tamajungtiba yimti 10 nungi asembo India nung lir

New Delhi, November 13 (Agencies): Alima nung mopung quality tamajungtiba aliba yimti 10 rongnung yimti asembo India nung lir, aser yimti asemji Delhi, Kolkata aser Mumbai lir, ta Switzerland nung amenoka aliba climate group-IQAir-i metetdaksü.

Alima nung mopung quality tamajungtiba aliba yimti Delhi lir; Delhi indang Air Quality Index (AQI) ji 556 lir, jenjang pezububa nung Kolkata (AQI 177) aser jenjang trokbuba nung Mumbai (AQI) lir. Alima nung AQI tamajungtiba linük ter rongnung Pakistan kübok Lahore yimti aser China kübok Chengdu yimti na densema lir.

IQAIR ya United Nations Environmental Program

(UNEP) indang technology partner ka lir. System of Air Quality & Weather Forecasting And Research (SAFAR) data ajanga ashiba agi, Honibarnepe (November 13) tashi nung Delhi air quality ji 499 liasü, PM 10 level 134 aser mopung nung PM 2.5 pollutants 72 liasü.

Central Pollution Control Board (CPCB) data ajanga ashiba agi, Honibar anepdang 9:00 ako nung Delhi kübok Anand Vihar nung AQI ji 468 liasü, ITO nung 484, RK Puram nung 433 aser Sri Aurobindo nung 452 liasü.

AQI 0 nungi 50 ji 'kanga tajung' ta züingshir, 51 nungi 100 ji 'tajung' ta züingshir, 101 nungi 200 ji 'tera junger' ta züingshir, 201 nungi 300 ji 'majung', 301

nungi 400 ji 'kanga majung' ta züingshir aser 401 nungi 500 bo kangasa majung, ta züingshir.

Delhi-NCR nung mopung quality kanga majungba dak sendakba nung Honibarnepe Supreme Court-i, nungdakra mopung menenba level ajema akümtsü atema sorkari anogo ananü lockdown sangdongtsüla, ta metetdaksüogo.

Supreme Court Chief Justice-i, aluyimertemi alu nung monü/azü rongdokba ajanga mopung menenbaji shilem 25 dang lir, mopung menenba tanungba shilem 75 jibo firecracker arongba, gari mokozü aser auyi apongba ajanga lir, ta metetdaksü.

Punjab assembly election atema AAP-i candidate 10 sangdong

Jalandhar, Yimpoksüi/November 13 (Agencies): Punjab nung anogo ana-asep tsüingda AAP MLA ana Congress nung adenba sülen Aam Aadmi Party (AAP)-i sangküm Punjab Assembly election atema party candidate 10 tenüing sangdongogo.

2017 küm Punjab nung AAP MLA 20 liasü saka tangbo party MLA 11 dang kümogo. Mongolbarnü Bathinda (Rural) menden nungi AAP MLA, Rupinder Kaur Ruby-i party toktsür Congress nung aden. Hombar aonung lai AAP membership nungi anenba shidi agüja liasü. Bodharnüa Raikot Jagtar nungi AAP MLA, Singh

Jagga-i party toktsür ruling party Congress nung aden. Ano AAP MLA kari party toktsüsüa akok, ta bilemer.

Sangküm küm tetenzüklen state assembly election atema AAP-i tang mezüing party candidate 10 tenüing sangdong, aser parnok rongnung tang MLA teinyakdakpurtem- Jai Kishan Singh Rori (Garhshankar menden), Sarvjit Kaur Manuke (Jagraon), Manjit Singh Bilaspur (Nihal Singh Wala), Kultar Singh Sandhwan (Kotkapura), Baljinder Kaur (Talwandi Sabo), Principal Budhram (Budhlada), Harpal Singh Cheema (Dirba), Aman Arora (Sunam), Gurmeet Singh 'Meet'

Hayer (Barnala) aser Kulwant Singh Pandori (Mehal Kalan) nung lir.

Sukhpal Singh Khaira-i AAP party toktsüba sülen pa den Pirmal Singh Khalsa aser Jagdev Singh Kamalu nungeri Congress nung aden. Khaira-i assembly nungi anenba shidi agütsüba Speaker-i agizükogo. Kharar nungi MLA, Kanwar Sandhu-ia AAP party inyakyim ashishia arudar, talisa Centre nung bangdak lenirtemi party tashi tali amshiba atema pai ola adoker.

Master Baldev Singh-ia Khaira den aden aser tesülen Speaker-i anentsü. Mansa nungi MLA Najjar Singh Manshahia-ia Congress nung denogo.



November 13, 2021 nü Bengaluru yimti tezülen National Aerospace Laboratories (NAL) indang drone ajanga bener arutsüba coronavirus vaccine Haragadde PHC nungi staff tem agizükba noksa nung angur.

Maharashtra nung Maoists telungpur 26 khaset

Nagpur, November 13 (Agencies): Maharashtra nung Gadchiroli district kübok Dhanora anasa arem ka nung state police den khatepba mapang Maoists telungpur 26 khasetogo, ta Nagpur nung ketdangsertemi metetdaksü.

Honibarnepe züingia Kolgut-Danat arem nung police aser Maoists telungpurtem tsüingda khatep tenzük aser nikongdang tashi khatepba mapang nung Maoists telungpur 26 khasetogo, ta ketdangser kati metetdaksü.

Gadchiroli district headquarters nungi ketdangsertemi ashiba agi, CPI(Maoist) aser Anti Naxal Operations kübok crack C-60 unit nungi commando tem tsüingda khatep.

"Tang tashi nung onoki arem nung Maoists telungpur tasüing 26 nguogo," ta district Superintendent of Police, Ankit Goyal-i metetdaksü.

Iba rara nung police-a pezü yirua helicopter ka ajanga Nagpur-i anir oa treatment agidar, ta paisa metetdaksü.



November 13, 2021 nü Varanasi nung All India Official Language Conference tenzükba sentong nung Union Home Minister, Amit Shah-i jembiba noksa nung angur.

Kü arrshi piyong Dharamshala nung dang alitsü: Dalai Lama

New Delhi/Dharamsala, November 13 (Agencies): Tibet nung yimsü lenir, Dalai Lama-i pa arrshi piyong India kübok Dharamshala nung dang alitsü aser pa Tibet-i meyipa aotsü sentong mali, ta metetdaksü.

"Ni küm aika Kangra valley kübok Dharamsala nung lia arudar. Ni yangi janratema alir. Ni yang nungi tesem ajaklen tangar den tongtepratepteter. Ni sadem-sadema alir. Küm ishika jakdang ni taoba mapang Ato kilonser, Dr Manmohan Singh dang 'ni kü arrshi piyong yangi dang liner, kechiyong yangibo ni sadem-sadema dang alir' ta shia liasü," ta pai metetdaksü.

Video conferencing ajanga Foreign Correspondents' Club of Japan (FCCJ)-i ayongzükba 'Cultivating a Good Heart' sentong nung jembidang pai item o jembia liasü.

India nung Coronavirus wara prokba mapang nungi tenzük tang tashi Dalai Lama-i Himachal Pradesh kübok McLeodganj jila nungi mainshir. 1959 küm China sepaitemi Lhasa nung Tibet nung anema inyakba mapang nung Dalai Lama ajentsüsa aküm, iba mapang nungjagi tenzük pa Dharamsala nung alir.

Pa Dharamshala nung aliba dak sendakba nung tasüingdangba ka langzüdang pai, ni Tibet nung meliner, kechiyong ni iba tesem (Dharamsala) kanga meimer, ta ashi. "Yangi rürjep agi labangba tenem, lenden, awatsüing aser tepor tajung

arem lir," ta pai ashi. Tawa China-i Dalai Lama den ken o jembitsü melunga lir, saka Tibet dak sendakba onük mejembitsü, ta metetdakja liasü. Dalai Lama-i India linük aser lenirtem tenüing kanga asanger aser iba linük ya yimsü balala amangertem tesünep nung aliba tiyongtsü ka lir, ta jembir.

Nai China Tir, Xi Jinping ajurutsü asü, ta asüingdangba langzüdang pai, "Sentong mali. Ajisüaka temeshi aini oa Wu Tai-shan semdangtsü jangraba ni aiben jembia arudar. Ni yamaji sütet nungbo ni China

lenirtem ajurutsü atema Beijing-i aotsü. Iba dakji alia ni China nung tejen medemertem, taoba mapang ketdangsertem aser sepia ketdangsertem ajuruner. Ni tambur akümer aser parnoka tambur kumdar, anungji ni parnoka koma lirar metetner," ta ashi.

Osangbener kati pa dang, nai Islam nung atema temeshitiba yimti Mecca semdangner asü, ta asüingdangba langzüdang pai, "Tamangba yimsü balala tesünep nung alitsü ajungkettsüba dak sendakba nung ni iba tesemji semdangner. Ni maongka dang ngura ni iba maongkaji agitsü.

Tesüiba mapang yangi India nunga ni tekülem ki balala semdangogo. Item rongnung Delhi nung aliba Jama Masjid densema lir; iba mapang nungji ni korang temesüing 'taqiyah' semer sarasadem nung shilem agia liasü," ta ashi.

Duterte'er jala Sara-i Philippines tatong tir atema tokteptsü



Sara Duterte (File photo)

Manila, Yimpoksiü/Nov. 13 (Agencies): Philippines Tir Rodrigo Duterte'er jalai tatong tir atema tokteptsü asoshi tenüng agütsüogo, ta lar odongtari ashi, anungji 2022 küm election nung la sentong idang asadanga aruba jangjaogo.

Arishi küm 43 tain Sara Duterte-Carpio'er political party indang candidate shidakbai tenüng agüja aliba agienba sülen la ya temelener ka ama tatong tir menden atema tenüng ya agütsü, ta la indang odongtar, Mayor Christina Garcia-Frasco ajanga Honibarnü sangdong ka nung ashi.

"Lakas-CMD (party) kübok Mayor Inday Sara Duterte-i la melen teshimtet nübu kar ajanga Vice President atema Certificate of Candidacy agütsüogo," ta lai Facebook nung ashi.

Teshimtet nisung kati la indang candidacy paper tem agütsüba sülen Ferdinand Marcos Jr indang teloki

Duterte-Carpio ya par vice-president asütsü sangdonga liasü. Ferdinand Marcos Jr ya taoba mapang Philippines nung tashi tait yimsüsür ka jabaso lir aser pa ya tir atema tokteptsü tenüng agütsüogo.

Duterte-Carpio-i mapang tatsüka tsünga sangdong ka agütsütsü, ta Garcia-Frasco-i ashi.

Duterte-Carpio ya tir asoshi tokteptsü akok ta küm tepiyong nüburtemi imla aruba mapang tatong tir asoshi sangdongba yagi aika süngmanger.

"Ibai tesüngmangtsüka liasü. Iba sülen ano tesüngmangtsü kaji VP ya shir atema," ta Ateneo de Manila University nung professor of law and politics, Antonio La Vina-i osangbener dang ashi.

Philippines nung tatong tir ya tir dang nungi khenyongi balaka shimteter.

Duterte-Carpio tebu arishi küm 76 tain ya constitution ajanga küm trok kümsük

tanabuba inyaksü memelar aser pai temesepba mozü anema raraba atema International Criminal Court ajanga bushisüngdangba mapang lir. Taoba ita pa yimten yimsüsüba nungi anisüngzüker ta sangdonga liasü.

Nütsüng yongsük million 110 aliba Southeast Asia linük nungya 2022 küm May ita nung tir nungi tenzüka governor, mayor aser tesem balala nung ketdangsürtem atema election agitsü.

Sara-i tatong tir atema tokteptsü lemtetba ajanga Marcos Jr ya tir menden angutsü jenjang tajungba kumdaktsür.

Nisung timbai Bongbong ta ajasang Marcos Jr ya voters survey tem nunga jenjang tanabuba nung liasü.

Sara-i Marcos Jr ya tatong tir atema tokteptsü asoshi ajungshitsü akok aser tena tsünga tesendaktep tajung ka yanglutettsü, ta aikati jembia aru.

Marcos kibong ya linük north aser centre nung tashi ita lir, aser Dutertes ya south tsütsü alirtemi kanga sabur.

Marcos Jr ya Brehostibarnü kiyimba benjong ka nung liasü aser Sara den külemi senzüa liasü, pai osangbener dang, "Ni kü sentong maneni inyaksü. Tir atema tokteptsü asoshi ni iba tetoktepsü nung tetsüng ajemok," ta ashi.

Marcos dak alaka taruba küm election nung tir atema tokteptsü sangdonga alirtemji taoba mapang boxing asayar mongin, Manny Pacquiao; Vice President Leni Robredo; Manila Mayor Francisco Domagoso; senator Panfilo Lacson aser Duterte'er taoba police tekolakba, Ronald dela Rosa nungertem alitsü.

Sudan yimsüsüri-i Khartoum nung mitkartem yoka lir

Khartoum, Yimpoksiü/Nov. 13 (Agencies): Mitkartemi sorkar atsüngdoker yimsü asüba anema democracy busema longkak aittsü lia Sudan mitkartem yimti-yimtung nung yoka lir, aser United States aser anüolen linüktemi ola adokaka mitkar tanishirtemi tashi tali amshir.

Mitkar tashi amshia sorkar atsüngdokba lenir General Abdel Fattah al-Burhan-i pasasa pa Sovereign Council nung tekolakba tanaben shimteter anogo ana lir Sudan indang democracy busemer temi Honibarnü "million person" march ayongzüka lir.

Brehostibarnü iba mera agiba yong democracy busemer jashidaktsü aser US aser danga linüktem tezü tangdaksü, shirnoki sorkar atsüngdokba meyipa agüjang ta ajungshia arur.

Sudan mitkartemi October 25 nü yimten tashi rakzük,

transitional government anentsü aser ketdangsür aser yimten yimsüsür aika pua liasü.

Mitkartemi iba mera agiba yong linük balalai aitsü aser Khartoum aser linük tesem balala nung nüburtemi longkak aita liasü.

Iba yagi democracy yimya nung yimsü asütsü asoshi sentong yanglua aliba raksatsü.

Honibarnü linük yimtiba, Khartoum nung nisung noklang aika adenshia longkak aitba senshidaktsütsü mechi Sudan security forces temi tear gas khaloktsü, ta tenük kuli alirtemi ashi.

Communication network tem nung timtem agüjaka Omdurman yimti nunga nisung noklang aika adenshia liasü, kong police temi tear gas amshia longkak aiter aridok.

Khartoum anüdoklena security forces temi tear gas khaloktsü aser iba sülen

longkak aiterem arishia liasü, ta ashi.

Khartoum south tsütsü Wad Madani nunga longkak aita liasü.

"Khartoum nung security forces tem tongtipang aputem nung kisüng masü saka yimtung nunga prokshia lir, anungji azüdokshi alitsü," ta iba yimti nungi osangbener kati ashi.

Honibarnü longkak aittsü ya Sudanese Professionals' Association aser Resistance Committee ajanga ayongzüka liasü. 2019 küm April ita Sudan lenir al-Bashir anema nüburtem nokdakba nunga telok ana yagi tongti shilem agia liasü. Ano danga political party aser telok tema iba sentong nung adentsü renema lir.

Mitkartemi sorkar atsüngdokba sülen parnok anema longkak aiter nisung 14 shi takum samatsüogo, ta Sudanese doctor aser UN ajanga ashir.

Poland-Belarus arütsü nung Syrian migrant tasü mang ka ngutet

Warsaw, Yimpoksiü/Nov. 13 (Agencies): Syria nunger lanur ka tasü mang Belarus den arütsü anasa arem nung ngutet, ta Poland police-i ashi, koba European Union anüdoklen arütsü nung yimtenren tsütsü mangatetep adoka alidak asür tesüsaba alitsü.

Minsk nung aliba sorkari ita aika migrant tem dang Poland, Lithuania aser Latvia ama EU linüktemi arütsü alema aitsü ajungshia arua liasü. Linük asemprongi arütsülen tanüker timba yoker, migration lenmang tasenba shibangtsü meranger aser asüka arur asünung tensa tamajungba akumer.

"Yashi arem nung arütsü anasa, Wolka Terechowska anasa Syria nunger teburchanu ka tasü mang ngutet," ta Podlaska region nung aliba police ajanga Honibarnü Twitter nung ashi.

"Tasü mang anguba tesem nung bushisüngdangba mapang pa asüba kuli tejangja mongutet."

Belarus nung mapang talangka nungi tir inyaka arusang Alexander Lukashenko-i ajungshiba migrant tem asüba rongnung

ibai nisung tuko buba alitsü.

Migrant tem ya aika Syria, Irak mesüra Middle East linüktem nungi lir, shirnok pei linük nung rara adoka aliba nungi jena aotsü meranger mesüra Europe nung takum jenjang tajungba akumtsü teimla nung aor. Arütsü nung migrant 4,000 shi adenshia lir, ta Poland arütsü anükertemi asadangteta lir.

2015 küm nisung aika Europe linüktem bushia aruba sülen Europe nung arütsülen tanüker timba yoka lir. Ajisüaka küm shia nisung meyrirjang aikati Europe telungi aittsü meranger aser aikati lendong tulu aliba mesüra takum samatsüsa tzyüim aser ali nung jajar.

Meyi mapang nungi tenzüka nisung meyrirjang aika Europe-i Belarus ajanga aitsü temelaba amai ajiteta arua liasü.

Lukashenko-i 2020 election nung tim masüba mapa inyakba aser iba sülen pa anemer tem pua merenshiba mechi European Union ajanga par sorkar nem tenokdangba agütsüba mangyanga pai migrant tem atema taila lenmang yanglur, ta EU-i aitsür.

Tigray telungpuri civilian aika tepset: EHRC

Addis Ababa, Yimpoksiü/Nov. 13 (Agencies): Sorkar anema nokdakba Tigrayan nungertemi Amhara region nung osang agütsür mesüra federal sepai nem teyari agütsür ta temolung melemi civilian 150 dak tema tepsetogo, ta government-affiliated Ethiopian Human Rights Commission ajanga report ka nung ashi.

Honibarnü adoktsüba bushisüngdang nungya nisung 128 den sensaksema liasü, koba Amhara nung rangloker bushisüngdang asü, kong July aser August ita Tigray People's Liberation Front (TPLF) aser Ethiopian sepaitem tsünga kanga sashia rara liasü.

Iba azüdokshi nung civilian tajemba agi 184 süogo, ta EHRC ajanga ashi aser TPLF temi amokbangba jila aser yimtsüngtem nung civilian tem metetsümonga tepset, ta tai tongloksü.

Federal sorkar yariba mesüra yirur aliba sepaitem nem anisüngzüker agütsüba atema civilian tem khaset aser tepset, ta commission-i ashi.

"Sorkar nemo sang agütsür ta temolung melemi bilemba nisungtem parnok amokbanga aliba jila nung TPLF temi tepset," ta ashi.

Rara agi raksatsür aliba Tigray nungi jena aortem lanurtemi tepset, shirnoki TPLF atema itdangiter asür, ta tai tongloksü, ta commission ajanga ashi.

"Ajidang masü telok anatsülen nungi totuyuba meliaka taochi makai injang aser bomb khaloktsüba ajanga civilian tem asü, yirutsü aser ki-o-jen

raksatsü."

Amhara region kübok South Gondar aser North Wollo Zones nung telok ajungai aibelenba ya tekeratiba nung anentsüla aser civilian tem timtem ajuruba anendaktsütsüla, ta EHRC chief commissioner Daniel Bekele-i ashi.

TPLF samatsütsü nükjidong nung Ato Kilonser Abiy Ahmed-i taoba küm November ita Tigray-i sepaitem yoka liasü, koba army camp tem nung sorkar anemertemi amakba asoshi telangzüba agütsüba mera ka lir, ta pai ashi.

2019 Nobel Peace sempet angusang Abiy Ahmed-i mapang talangka meindoki takok angutsü nangzükaka June ita tatemlen tashinung TPLF temi Tigray kübok tesem timba tanaben agia ano Amhara aser Afar tashi oa liasü.

Meimchir timtem balala ajuruba tali akumba, nisung aika tepsetba, tim masüba mapa inyakba aser tepok masüngba timtem ajuruba ajanga temeden asoshi nokdakba teloktemi ola adoka liasü.

Amhara nung jila ka amakdang Tigrayan rebel temi tetsür dak tashiyim agi shi nung medem, auya aser züka merenshi, ta Amnesty International ajanga ashi.

TPLF ajanga Amnesty ya aitsü saka par sasa bushisüngdangtsü ashi. "Onoki bushisüngdangba mapang Tigrayan fighter temi iba ama mapa tamajung inyakba bushitetra, Tigray sorkari aibelenem nem tapet temerenshi agütsütsü," ta ashi.

Taapsee Pannu-i 'Woh Ladki Hai Kahaan' tangok tenzüksü



Taapsee Pannu (File photo)

Mumbai, Yimpoksüi/ November 13, 2021 (Agencies): 'Shabaash Mithu' tangokzüker sülen, Taapsee Pannu-i ano 'Woh Ladki Hai Kahaan?' ta nungja agütsüba project tasen ka tangok tenzüksü bilemdar.

Taapsee-i 'Instagram Story' nung selfie noksa ka den project tasen indang osang lemsatepa liasü.

Iba film script ya 'Breathe Into The Shadows' co-writer

Arshad Syed-i zülutsüsü aser pai direct asütsü. Project tasenba nung Taapsee-i Pratik Gandhi den külemi shilem agiba angutsü.

Taruba film ya 'investigative comedy' ka asütsü ama asadany, kong Taapsee-i police ama aser Pratik-i nisung tamajung ama shilem agitsü.

Roy Kapur Films ajanga 'Woh Ladki Hai Kahaan' project nungitsü. Taküm küm tetenzüklen February ita

producer Siddharth Roy Kapur ajanga iba film sangdonga liasü.

Twitter nung, Kapur-i actor ana (Taapsee aser Pratik) den külemi tangokba noksa ka lemsatep.

"Onok indang taruba production pelashishia sangdonger. @taapsee aser @pratikg80 nati shilem agiba #WohLadkiHaiKahaan? film ya comedy ka asütsü. Iba project #SiddharthRoyKapur ajanga produce asütsü aser @justarshad-i otsü zülua direct asütsü. Iba film yakta tangok tenzüksü," ta Kapur-i lemsatep.

'Shabaash Mithu' ya Taapsee Pannu-i film tasen asütsü aser tawa iba film tangokmaogo. 'Shabaash Mithu' ya ya Indian cricketer Mithali Raj indang taküm otsü nung ajemdaker yangluba otsü ka lir. Iba film nung Taapsee-i India tetsür cricket team captain, Raj ama shilem agiba angutsü.

Taapsee-i 'Rashmi Rocket' nung tesüsa shilem agiba nguogo. Taapsee-i tongti shilem agiba sports drama ya Akarsh Khurana-i direct süogo. Iba film nung Taapsee dak alaka Priyanshu Painyuli, Supriya Pathak, Abhishek Banerjee aser Supriya Pilgaonkar nungeri tongti shilem agiba angutsü.

MOLUNGNEN O

Onoki teti meima aliba asür **Imtila** (Anaki) la mapang tatsüka shiranga alidang aser 4th Nov. 2021 nung iba akümüli nungi pila-a orr onok mangyim jashi nung alidang temiemertem kwikati ali rongsen, nübu aser shisatsü den sarasadem agi yariogo nenok ajak dang pelaba lemsateper. Nenok dangi tsüngtong arua pelaba meshitetba atema sasaa bilemer.

Saka nenok mapa tajung onoki teti bilemtettsü. Tsüngremi nenok ajak moajang ta ozü tamang sarasadem.

Temeim Kinungpu, Chirnur aser Kinunger.



OFFICE OF THE
UNGMA SENSO TELONGJEM

KOHIMA : NAGALAND

Regd. No. H/RS-1140, Dt. 17-10-2000

KONANG TETUSHI

Dr. S.C. Jamir Padma Bhushan, koba India linük nung sempet tulutiba rongnung Tasembuba lir iba sempet pai nübür wadang nung alaketta aser mayang süa tenzüksetba atema 8th November, 2021 anogo anguba asoshi Ungma Senso Telongjem Kohim aser Kohima meketa bendang alir Ungma nung ajaki Konang tetushi agütsür.

Dr. S.C. Jamir, shiba Nagaland State tenzüker rongnung ka aser Nagaland nung Chief Minister pezüben inyaka aru ano Goa, Maharashtra, Gujarat aser Odisha nung Angh inyaker, Nagaland nung mezüngbuba Padma Bhushan Dr. S.C. Jamir nem sempettsüba ya talisa Ungma nung aser Naga nung inti atema konang nungsang ka lir.

Soyimsanger rongnungi ka nem iba sempet agütsüba atema India Sorkar dang USTK-i kümrem pelaba sangdonger aser Padma Bhushan, Dr. S.C. Jamir lanu putu asoshi milen sangwa ka alitsü ano sa anema yujang ta sarasademtsür.

Sd/-
(CHUBAMAYANG JAMIR)
Tir

Sd/-
(TEMJENSOWA JAMIR)
Tongti Zulur

METONGSHIA AZÜNGTSÜ MEPISHIR

-S. T. Yapang Lkr. Kohima,
9856714829 / 9612800973

Tir Yimyim 10/11/21 anogo züluba nung "nenoki Süpongmeren tasür dena timtemdaksüa Naga nung rongnungi mezüng temulung meyipa tzüsensang ta züluba ajanga ABAM ya tiyazü tebu ka kümdaksü, masüa na?" ta alibaji "...Aor rongnungi..." ta metongshia azüngtsü mepishir.

"Sooryavanshi" ajanga anogo 8 nung cr. 127 aazükogo



New Delhi, Yimpoksüi/ November 13, 2021 (Agencies): Rohit Shetty-i direct asüba 'Sooryavanshi' film, kong Akshay Kumar aser Katrina Kaif nati shilem agir, iba film sayar hopta ka nung box office nung cr. 100 dak tema aazükogo.

Iba film ajanga audience jenti atsüa arudar aser box office nung takok ngua aoba ajanga film ajungba kuli tejangja sayur.

Ajisüaka, film sayar hopta tanabuba nung, box office nung sen aazükba tera ajemogo. Tanabuba Hokolbarnü, iba film ajanga sen cr. 7 shi aazükogo

aser tang tashi iba film ajanga sen cr. 127 shi aazükger asütsü.

Boxofficeindia.com sangdong ka ajanga angazükba agi, Sooryavanshi film sayar anogo 8buba nung cr 6.75 nungi 7 tsüngda aazük.

Iba cop drama ya taoba küm March 24, 2020 nung sayatsü renem, saka alima ajunga asüngba COVID-19 wara ajanga India ajunga nung cinema hall ajak shibangadok.

'Sooryavanshi' nung Bollywood star, Akshay-i DSP ka ama shilem agir, shibai film nung mapa tamajung inyaker anema rarar. Kasa film nung,

Katrina-i Akshay tetong ka ama shilem agir. Tena dak alaka, iba film nung Ajay Devgn (Singham) aser Ranveer Singh (Simmba) nati shilem tilala agir.

'Sooryavanshi' ya 'Singham' franchise indang tatongtep film ka asütsü. Singham aser 'Singham Returns' nung Ajay Devgn-i tongti shilem agiogo. Aser iba project ulushitsü atema 'Simmba' yanglua liasü, kong Ranveer Singh-i tongti shilem agir. Tang, project tasenba nung Devgn aser Ranveer nati Akshay Kumar indang character den külemi shilem agiogo.

AR Motorcycle Rally Kohima tongogo

Kohima, November 13, 2021 (TYO): India nüjiso ngur küm 75 ajungba nungtem nung, JAWA Motorcycles den longjemer Assam Rifles Motorcycle Rally ayongzüker aser Hokolbarnü, iba rally Kohima tonga liasü.

Iba rally nung rider 24 agi shilem agidar aser November 07, 2021 nü Silchar nungi iba rally tenzüker aser Bresthostibarnü (11.11.2021) Jwalamukhi, Manipur tonga aru. Iba rally yagi Northeast indang state ajunga

(State 7) ayimjema senzüksü aser Hombarnü (15.11.2021) Shillong nung tembangtsü.

Assam Rifles-i Northeast nung telungpur maparen azüöksü asoshi meranga inyakba nübür dang metetdaksütsü aser linük kümzüka ayutsü asoshi sepaitemi taküm bendanga agüja raraba bilemtettsü nükjidong nung iba rally ayongzüker.

Maneni, Hokolbarnü, iba Motorcycle Rally ya Jwalamukhi nungi tenzüker aser anepdang

10:00 ako meta Kohima War Cemetery atong. Iba mapang, Brig Vinod Bajiya, SM, Dy IGAR(N) aser 1 Naga Girls NCC Battallion nungi NCC cadets ajanga bikers tem agizük. Team leader, Capt Navdeep-i Kohima War Cemetery nung narozük inoktsü aser parnoki NCC cadets den sensaksema liasü. Telok süngo ajemba sülen, Dimapur ajanga Jorhat-i aotsü atema biker team ya Kohima nungi apusoa liasü.

Willem Dafoe aser Emily Watson na longjemtsü



Yimpoksüi/November 13, 2021 (Agencies): Taruba fantasy film - 'The Legend of Ochi' nung actor Willem Dafoe aser Emily Watson nati tongti shilem agitsü.

Iba film ya director Isaiah Saxon-i yanglutsü, koba pa indang mezüng film asütsü. Taoba mapang, Isaiah-i nungtugu artist talisa Bjork, Panda Bear, Dirty Projectors, Kanye West aser Grizzly Bear atema music video aser project balala yangluba ajaki jangjaa lir.

Dafoe aser Watson dak alaka, 'The Legend of Ochi' film nung Finn Wolfhard aser Helena Zengel nati shilem agiba angutsü.

Composer aser Dirty Projectors ngutetsang, Dave Longstreth-i iba project nung inyaksü. Taoba mapang, Saxon indang animation aser film studio nung pai inyadanga lir.

Saxon aser Encyclopedia Pictura den Neighborhood Watch atema Traci Carlson aser Richard Peete; aser Jonathan Wang den 'Year of the Rat' longjemer 'The Legend of Ochi' produce asütsü.

Film yanglur Anthony aser Joe Russo, AGBO indang Mike Larocca aser Angela Russo-Otstot den Louise Lovegrove aser Alex Plapinger longjemer executive producer ama inyaksü.

Nagaland Duty cum Sports Meet 2021' tenzükogo

Dimapur, Yimpoksüi/November 13, 2021 (TYO): NAPTC Stadium, Chümoukedima nung Hokolbarnü (12.11.2021) Nagaland Duty cum Sports Meet 2021 tenzükogo, ta sangdong ajanga metetdaksü.

Iba Sports Meet lapokba sentong nung, alakteta tejaoker ama Chief Minister, Neiphiu Rio dena liasü.

Rio-i, alima ajunga asüingba coronavirus wara ajanga maparen ajak nang tetsükdaksü tulu adokdaksüogo aser iba wara ajanga nüburtem maneni timtemdar, ajisüaka item tenokdangba liaka, nübur asoshi police-i yakpang ser meranga inyakogo, ta ashi.

Pei nem nüngloksüba maparen bendanga agüja aser nendaka inykaba atema pai, Police nung officer, tulu aser tila ajak dang pelaba metetdaksü.

Indian Olympic Association (IOA), president aser International Hockey Federation (IHF) president, Dr Narinder Dhruv Batra adenba ajanga iba Sports Meet tali meraketedaksür, ta Rio-i shisem aser saisapong tsütsü shisatsü agi nungitta yariba atema pa danga pelaba metetdaksü. Batra akhüm kübok State nung saisapong tsütsü terenlok lia tejakleni aotsü imlar, ta Rio-i ashi.

Iba 'duty cum sports' week ajanga sempet tajung alir saisapongertem maneni tejakleni aotsü aser State atema tenüng tajung bener arutsü imlar, ta Rio-isa ashi.

"Pei dak ajemaluba shisatsü alitsüla aser kechisa inyakdir temulungtetba tulu nung inyaktsüla," ta Rio-i telok ayongzüka liasü.

Item jakla aser sempet ali

nungang temaba jenjang ajangzükettetsü, ta pai shisem.

State nung saisapong ajungkettsü atema, storey 6 aketba buliding ka renemogo aser iba building amshitsü atema maparen tenzüksü, kong teti atema Nagaland Olympic Association (NOA) office ka lapoktsü aser saisapong tentet 20 tashi achaayangtsü aser saisapong tsütsü national aser international level nung tokteptsü asoshi sempet tajung alir asayartem jangjatetsü, ta Rio-i metetdaksü.

Iba dak sendakba nung, Rio-i, tawa tanü saisapongertem tejakleni aotsü asoshi state sorkari sabang ka agüja liasü, ta pai ashi.

"Sports administration junga achaayangtsü atema iba sports complex nung sports management software amshitsü," ta Rio-i shisem.

India-i 'South Asian Cross Country Championship', ayongzüksü renemdar aser iba asayamung ama Nagaland ya tayonger State ka ama shima liasü. Iba den bendenloksema, State nung Indian National Rally Championship indang grand finale ayongzüksü, ta pai ashi.

Aruya aliba 'South Asian Cross Country Championship' dak sendakba nung, Rio-i, medal angutsü nükla yur State-i shilem agitsüla ta ashi aser medal angutsü asoshi meranga inyaktsüla ta pai lanurtem ayongzüka liasü.

Nagaland Duty cum Sports Meet 2021 ayongzüksü asoshi maparen balala takok ngua achaayangba atema, Rio-isa deputy chief minister, Y Patton, DGP, T John Longkumer aser iba asayamung nung inyakker

'rank & files' ajak dang pelaba metetdaksü.

Maneni, iba sentong nung tetushi tejaoker, president, Indian Olympic Association (IOA) aser president, International Hockey Federation (IHF), Dr Narinder Dhruv Batra-i jembia liasü.

Dr. Batra-i, nisung taküm nung saisapong ya tongtibang shilem ka aser talisa police force atema saisapong kanga dang tongtibang lir aser asayar tajung ka akümtsü asoshi tasa, jeretperaba, kümdangshiba aser tongtibangsa temulungtetba tulu alitsüla, ta ashi.

Battalion ka saisapong nung shilem agitsü asoshi asayamung ayongzükba atema Batra-i Nagaland Sorkar dang pelaba metetdaksü aser India nung iba ama Sports Meet ya mezüng asütsü, ta pai shisem.

Iba dak sendakba nung, Batra-i, koloni oaka, iba Sports Meet tasa indang jembitsü aser iba amala tasa bendenloka inyakba ajanga linük nung tarutsü asoshi saisapongertem tajung adoktsü lenmang lapoktsü, ta ashi.

Batra-isa hockey turf ka yanglutsü asoshi Rio ajungshia liasü aser State nung nisung 2000 asemtsüsa, change room aser utility tem peria aliba hockey turf ka yanglura, Nagaland State nung international asayamung ayongtsüsa maongka angutsü. Ajiasünungang, saisapong tsütsü alimai Nagaland jangjatetsü, ta pai ashi.

Iba Sports Meet lapokba sentong nungsa DGP Nagaland aser Abu Metha napronglai jembio, ta kasa sangdong ajanga metetdaksü.

Tir Kovind-i National Sports Awards 2021 agütsü



New Delhi, Yimpoksüi/November 13, 2021: Tokyo Olympics Champion Neeraj Chopra nem India Tir Ram Nath Kovind-i Major Dhyan Chand Khel Ratna Award agütsüba noksa nung angur.

New Delhi, Yimpoksüi/November 13, 2021 (Agencies): Honibarnü, Rashtrapati Bhavan nung sentong ka ayonga agiba mapang, India Tir, Ram Nath Kovind-i National Sports Awards 2021 agüja liasü.

Iba sentong nung, Olympic champion - javelin thrower Neeraj Chopra, taoba mapang India tetsür cricket asayar Mithali Raj aser Paralympic stars temi Major Dhyan Chand Khel Ratna agizük, koba award angur rongnung parnok nem iba tetushi award mezüng agüja liasü.

Rashtrapati Bhawan kübok Durbar Hall nung sentong tulu ka ayonga agiba mapang, linük nungi taküm Olympic aser Paralympic nung shilem agirtem jangjateta liasü. Taoba küm alima ajunga asüingba COVID-19 wara ajanga online nung iba sentong agiba sülen, taküm iba sentong ya nisung dena agiogo.

Iba sentong nung Union Sports minister Anurag Thakur den taoba Sports Minister Kiren Rijiju den tangae tongtibang nisungtem dena liasü.

Iba sentong nung Chopra-i Khel Ratna award agizükba mapang teloki teka madena pa pelashishia agizükogo.

Arishi küm 23 tain Chopra dak alaka, iba sentong nung Khel Ratna award agizükertemji Olympic bronze medal takok angur Indian men's hockey team captain Manpreet Singh, taoba mapang Indian men's hockey team goalkeeper P R Sreejesh, Olympic silver-medal angur wrestler Ravi Dahiya, Olympic bronze medal angur boxer Lovlina Borgohain aser Mithali nunger asütsü.

Iba Award agizükertem Indian football asayar rongnung Sunil Chhetri mezüng kümogo. International football asayamung nung goal timba idaktsür rongnung Argentina nunger Lionel Messi den meneptepa (goal) asayaba atema Sunil nem iba tetushi award agütsü.

Paralympic gold medal angur Avani Lekhara (Shooting), Sumit Antil (Athletics), Pramod Bhagat (Badminton), Krishna Nagar (Badminton), Manish Narwal (Shooting) nungeri Khel Ratna Award agizükogo.

Khel Ratna Award 12 den, taküm India-i Arjuna award 35 agütsüogo. Taküm Tokyo Olympics nung otsüsütsüsa India nungi Olympics athlete (medal 7)

aser Paralympics para-athlete (medal 19) temi takok tulu anguba yong, award timba agütsür asütsü.

Arjuna Award angur rongnung Arpinder Singh (athletics), Simranjit Kaur (boxing), Shikhar Dhawan (cricket), Bhavani Devi Chadalavada Anandha Sundhararaman (fencing), Monika (hockey), Vandana Katariya (hockey), Sandeep Narwal (kabaddi), Himani Uttam Parab (mallakhamb), Abhishek Verma (shooting), Ankita Raina (tennis), Deepak Punia (wrestling), Dilpreet Singh (hockey), Harman Preet Singh (hockey), Rupinder Pal Singh (hockey), Surender Kumar (hockey), Amit Rohidas (hockey), Birendra Lakra (hockey), Sumit (hockey), Nilakanta Sharma (hockey), Hardik Singh (hockey), Vivek Sagar Prasad (hockey), Gurjant Singh (hockey), Mandeep Singh (hockey), Shamsher Singh (hockey), Lalit Kumar, Upadhyay (hockey), Varun Kumar (hockey), Simranjeet Singh (hockey), Yogesh Kathuniya (para-athletics), Nishad Kumar (para-athletics), Praveen Kumar (para-athletics), Suhash Yathiraj (para badminton), Singhraj Adhana (para shooting), Bhavina Patel (para table-tennis), Harvinder Singh (para archery) aser Sharad Kumar (para-athletics) dena lir.

Khel Ratna award angur nem senpet lakh 25 den medal ka aser 'scroll of honour' agütsür. Ano, Arjuna award angur nem senpet lakh 15 den bronze statue aser 'scroll of honour' agütsür.

* Dronacharya Award takok angurtem:

Radhakrishnan Nair (Athletics), Sandhya Gurung (Boxing), Pritam Siwach (Hockey), Jai Prakash Nautiyal (Para Shooting), Subramanian Raman (Table Tennis)

* Dronacharya Lifetime Award takok angurtem:

TP Ouseph (Athletics), Sarkar Talwar (Cricket), Harpal Singh (Hockey), Ashan Kumar (Kabaddi), Tapan Kumar Panigrahi (Swimming)

* Dhyan Chand Award for Lifetime Achievement in Sports

Lekha KC (Boxing), Abhijeet Kunte (Chess), Davinder Singh Garcha (Hockey), Vikas Kumar (Kabaddi), Sajjan Singh (Wrestling)

Medziphema Winter Badminton Tourney tembangogo



Medziphema, Yimpoksüi/November 13, 2021: 1st Winter Badminton Tournament temer sülen sempet agütsüba mapang, iba asayamung nung takok angurtem den Miathou Krose, Chairman, NHHDC, ADC Medziphema, OC Medziphema aser asayamung ayongertem külemi tangokba noksa ka yangi angur.

Medziphema, Yimpoksüi/November 13, 2021 (TYO): ADC Medziphema den Medziphema Town Youth Organization aser Medziphema Town Students' Union (MTYO & MTSU) longjemer ayongba 1st Winter Badminton Tournament Hokolbar (12.11.2021) nikongdang tembangogo, ta sangdong ajanga metetdaksü.

Iba asayamung atema Advisor, Sericulture, Excise & Minority Affairs, Govt of Nagaland MLA Zhaleo Rio, IAS (Retd.)-i teyari agütsü. Ibauba Winter Badminton Tournament shibangba sentong nung Miathou Krose, Chairman, NHHDC Nagaland alakteta tejaoker ama dena liasü.

* Ibauba Winter Badminton Tournament nung takok angurtem

yamai alitsü:

- Champion: Meyiezo Pusa & Kenei Kera of New Medziphema (Jharnapani)
- Runners up: Yavikolie Vüprü & Atoka Swu of Ward-4, Medziphema Town

Takok angur nem agütsüba awards nung Racquet anana (racquet shia sen 4000/- asütsü) den senpet 3000/- dena lir. Kasa mapang, runners-up nem Racquet anana (racquet shia sen 2000/- asütsü) den senpet 2000/- agütsüogo.

Racquet aser senpet atema MLA Zhaleo Rio asee Miathou Krose nati tenla agüja liasü.

Maneni, iba asayamung atema MLA-isa net, shuttlecock tenla agütsü. Ano külen, Miathou Krose-i Semi-finalist team tem atema senpet 3000/- (3000/- each) aser t-shirts agütsü, ta kasa sangdong nung shia lir.

Naga nunger longjemtsü atema Naga... (TAPAK 1 NUNGI...)

Naga nungeri mezüng asüküm aser konang bushiba endoktsüla. Iba ajanga asen lokti, rongsenketzüng aser yimtenren amokbanga lir. Naga nungeri tasü aittsüla, ajemalulutsüla, molungso alitsüla aser shisatsü angazüksüba tangatetba ali nung dang asen lokti shia arutsü. Item ajanga asen kija asoshi dang bilemba tangatetba agientsü aser asen lokti nung temelenshi tajung bener arutsü" ta Naga Club tirisa ayongzük.

"Naga nungeri lokti nung temelenshi tajung bener aruba lennirtem nüngdaker. Temeten

agütsüba lennirtem nüngdaker, khuret kokteter aser kanga junga bilemdanga inyakker lennirtem nüngdaker. Alizüng tajung ayuba aser ochi bushiba lennirtem nüngdaker" ta paisa metetdaksü.

"Naga Club züngsemtemi Naga putiotsü nung taruba tapak

2021-24 kümsük atema Naga Club ketdangpurtem:

President	- Kuolachalie Seyie
General secretary	- K N Mhonthung Lotha
Vice presidents	- K John Lohe, Visa Meru & Y Vandanshan Lotha.
Secretaries	- Akho Leyri & K Gwanilo Himp.
Treasurer	- Hoshito Asummi.
Finance secretary	- Seyiekuolie Kesiezie.
Advisors	- Ariyi Nienu, Pheluophelie Kesiezie, Dr Tushi Ao, Dr Vinito L. Chishi, Kewezu Meru aser Khyomo Lotha.

zülutsüla. Asenoki tangar asoshi lenmang lapoktsütsüla aser asen meketa aliba lima nung temelenshi tajung bener arutsüla" ta paisa ashi.

Iba sentong nungsa taoba aser Naga Club caretaker Khyomo Lotha-i Naga Club indang centenary souvenir sayatsü.

BILEMDANGANG
"Temerüktet tenla nung tagütsüsang dak Tsüngremi menüremloksür."